

DOMINGO 10 ORDINARIO CICLO B

PRIMERA Xen 3, 9-15

Poñerei hostilidade entre a túa descendencia e a da muller

PROCLAMACIÓN DA PALABRA RECOLLIDA NO LIBRO DA XÉNESE

Despois de que o home comeu da árbore, Deus chamou por el, preguntándolle:
-"Onde estás?"
Respondeu o home:
-"Oínte no xardín, e tiven medo. Ao verme espido, agacheime".
Preguntoulle o Señor Deus:
-"Quen che dixu que estabas espido? É que comiches da árbore da que che prohibira comer?"
Respondeulle o home:
-"A muller que me deches por compañeira ofreceume do froito, e comín".
O Señor Deus díxolle á muller:
-"Que é o que fixeches?"
E a muller respondeu:
-"A serpe enganoume, e comín".
Entón o Señor Deus díxolle á serpe:
-"Porque fixeches isto, maldita sexas entre os animais e as feras todas do monte. Andarás arrastrada e comerás po toda a túa vida. Poño hostilidade entre ti e a muller, entre a túa liñaxe e a dela. Ti tentarás de atanguerlle o calcañar, pero ela esmagarache a cabeza".

SALMO RESPONSORIAL Sal 129, 1-2. 3-4ab. 4c-6. 7-8

R/ (7): No Señor está o amor e a redención cumprida.

Desde os abismos chámote, Señor;
escoita, Señor, a miña voz.
Ten atentos os oídos
ao clamor da miña súplica.

Se ti levas conta dos pecados,
¿quen, Señor, se terá en pé?
Mais en ti está o perdón,
para te faceres respectar.

Eu espero no Señor, a miña alma espera;
eu confío na súa palabra.
A miña alma vólvese ao Señor,
máis do que os vixías á aurora.
Se os vixías esperan a aurora,

que Israel espere ao Señor,
pois no Señor está o amor
e a redención cumprida.
El é quen redime a Israel
de todos os pecados.

SEGUNDA 2 Cor 4, 13 - 5, 1

Cremos, por iso falamos

PROCLAMACIÓN DA PALABRA RECOLLIDA NA SEGUNDA CARTA DE SAN PAULO APÓSTOLO AOS CORINTIOS

Irmáns e irmás:

Mantendo o mesmo espírito de fe, segundo o que está escrito creo e por iso falo, tamén nós cremos e por iso falamos. Porque sabemos que Aquel que resucitou a Xesús nos ha resucitar tamén a nós con Xesús e nos ha colocar convosco onda el. Todo isto acontece por causa vosa, de modo que, ao estenderse a graza, se multiplique o número dos agradecidos, para gloria de Deus.

Por iso non nos apoucamos: aínda que o noso exterior vai esmorecendo, o interior, todo o contrario: renóvase de días a días. Os sufrimentos transitorios e leves preparánnos unha inmensa carga de gloria eterna por riba de toda medida. Non poñemos as nosas olladas nas cousas que se ven, senón nas que non se ven; porque as que se ven son efémeras, mentres que as que non se ven son eternas.

Sabemos que, se a nosa morada terrestre -que vén ser coma unha cabana-, se derrubase, contamos cunha edificación de Deus, unha casa eterna no ceo, non feita por mans de homes.

DOMINGO 10 ORDINARIO CICLO B

EVANXEO Mc 3, 20-35

Satán ten fin

PROCLAMACIÓN DO SANTO EVANXEO SEGUNDO MARCOS

Foi Xesús cos seus discípulos para a casa; alí xuntouse de novo tanta xente, que nin podían comer. E cando o souberon os seus parentes, foron buscalo á forza; porque a xente dicía que perdera o sentido.

Os letrados que baixaran de Xerusalén, dicían: "ten dentro a Belcebú; bota fóra os demos co poder do príncipe dos demos". El chamou por eles e púxolles estas comparanzas:

-Como pode Satanás botar a Satanás? Se un reino está dividido en contra de si mesmo, non se pode manter en pé. Se unha casa está dividida en contra de si mesma, non pode subsistir. Así que, se Satanás está dividido e loita contra si mesmo, non pode subsistir e está perdido.

Ninguén pode entrar na casa dun home forte, e roubarlle canto ten, se primeiro non o amarra; só entón poderá arramplar con canto hai na casa.

Tede por seguro que todo se lles perdoará aos homes, os pecados e cantas blasfemias digan; pero a quen blasfeme contra o Espírito Santo, nunca se lle perdoará, e cargará eternamente co seu pecado.

Isto dicíao porque eles acusábano de que tiña dentro un espírito malo.

Nisto chegan súa nai e mailos seus irmáns, e mandárono chamar desde fóra. Era moita a xente que estaba sentada arredor del, e fóronlle dicir:

-Aí fóra están túa nai e mais teus irmáns, que te veñen buscar.

El respondeu:

-Quen é miña nai, e quen son meus irmáns?

E mirando os que estaban sentados arredor del, dixo:

-Velaí a miña nai e mailos meus irmáns: pois o que cumpra a vontade de Deus, ese é o meu irmán, a miña irmá e miña nai.